

## MORRIS, HAYDN (1891 - 1965), cerddor

**Enw:** Haydn Morris  
**Dyddiad geni:** 1891  
**Dyddiad marw:** 1965  
**Rhiant:** Rachel Morris  
**Rhiant:** Richard Morris  
**Rhyw:** Gwryw  
**Galwedigaeth:** cerddor  
**Maes gweithgaredd:** Crefydd; Cerddoriaeth  
**Awdur:** Huw Williams

Ganwyd yn Llanarthne, Caerfyrddin, 18 Chwefror 1891, yn fab i löwr, a'r ieuangaf o saith o blant. Collodd ei rieni (Richard a Rachel Morris) yn ieuanc; aeth i weithio i lofa New Cross Hands yn 12 oed, ac aros yno hyd nes y penderfynodd ymroi'n llwyr i gerddoriaeth yn 1916.

Ymddiddorai mewn cerddoriaeth yn gynnar iawn yn ei fywyd, a bu'n astudio yn gyntaf gydag athrawon lleol, ac yna gyda [D. Vaughan Thomas](#) yn Abertawe. Ar ôl iddo ennill A.R.C.M. yn 1918 trefnwyd cyngerdd i'w gynorthwyo i gael addysg bellach. Aeth i'r Academi Gerdd Frenhinol yn Llundain yn ddiweddarach y flwyddyn honno, lle y bu'n astudio tan 1922, gan ennill gwobr Oliveria Prescott am gyfansoddi, a derbyn cymeradwyaeth arbennig gan Edward Elgar. Graddiodd yn Mus. Bac. yn 1923, a derbyniodd radd D.Mus. o Brifysgol Efrog Newydd yn 1943.

Gwrthododd swyddi yn yr Academi Gerdd Frenhinol ac yn Canada yn 1923, a threuliodd ei yrfa fel organydd a chôr-feistr mewn tair o eglwysi yng Nghymru, sef yn eglwys Heol Undeb Caerfyrddin (hyd 1926), eglwys Soar, Merthyr Tudful (1926-28), a Chapel Als, Llanelli (1928-60). Yn Llanelli treuliodd flynyddoedd prysur fel athro, beirniad, arweinydd a chyfansoddwr. Bu farw Rhagfyr 1965 a'i gladdu yn Llanelli.

Yr oedd yn un o dri chyfansoddwr amlwg y cyfnod rhwng y ddau ryfel a fwriodd eu prentisiaeth yn yr Eisteddfod Genedlaethol (y ddau arall oedd [W. Bradwen Jones](#) (gweler [JONES, WILLIAM ARTHUR uchod](#)) a [W. Albert Williams](#), a thros gyfnod o tua 40 mlynedd enillodd dros 60 o wobrau yn adran cyfansoddi'r brifwyl. Fe'i hystyrir yn un o gyfansoddwyr Cymreig mwyaf amlochrog a chynhyrchiol ei ddydd, a chyhoeddodd dros 450 o wahanol weithiau cerddorol, yn cynnwys operâu, operetâu, rhan-ganeuon, cantatâu, unawdau, a gweithiau ar gyfer bandiau pres, piano, llinynnau a cherddorfa. Yr oedd hefyd yn awdur nifer o gasgliadau o alawon telyn, baledi, a chaneuon, heblaw llawlyfr buddiol ar ganu penillion a gwerslyfr ar ganu piano (yr unig gyhoeddiad o'i fath gan gyfansoddwr Cymreig) a gyhoeddodd ar ei liwt ei hun yn 1924.

### Awdur

Huw Williams, (1922 - 2002)

### Ffynonellau

Ymchwil bersonol ynghyd â gwybodaeth gan ei weddw, Mrs. Eluned Morris, Llanelli

### Dolenni Ychwanegol

VIAF: [41529593](#)

Wikidata: [Q13703019](#)

Dyddiad cyhoeddi: 1997

Hawlfraint Erthygl: <http://rightsstatements.org/page/InC/1.0/>

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchfrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.

